

景明刻本紀錄彙編

卷之四 紀律彙編

一

紀錄彙編卷之六十九

鴻猷錄卷三

高岱

克陳友諒

陳友諒者湖廣沔陽漁家子也本姓謝先世贅于陳
冒陳姓嘗爲縣吏不樂其職會中原兵起徐壽輝與
倪文俊等以元至正辛卯攻陷蘄水黃州等處僭稱
皇帝國號天完改元治平未幾陷漢陽興國武昌又
遣趙普勝陳普文項普畧党仲達分兵陷九江吉安
池州杭州荊州岳州等郡元兵累討之不克衆號百

萬友諒往從文俊麾下爲簿書掾尋領兵爲元帥後
壽輝爲元兵所敗走倪文俊迎壽輝居之漢陽文俊
漸專恣友諒意不能平丁酉秋文俊謀弑壽輝不果
奔黃州友諒遂襲殺文俊併其軍自稱平章壽輝不
能制丁酉十月上駐師金陵二年矣已畧定江東
諸郡又取揚州乃命常遇春率廖永安吳禎等由銅
陵進取池州又命李文忠領兵策應之師抵城下攻
破其北門入城斬壽輝將洪元帥又執其黨魏壽徐
天雄等亡何友諒聞池州破以戰艦百餘艘來逆戰
遇春等奮擊大敗之遂以趙忠守池州戊戌春正月

友諒陷元安慶元守臣余闕歿之夏四月友諒又陷元江西隆興及瑞州未幾遣其黨趙普勝自樅陽寇我池州太平守將劉友仁聞之率兵赴援遇賊與戰敗沒五月友諒遣其黨康泰趙琮鄧克明等陷元邵武又自南昌遣兵陷元撫州八月又陷元贛州十一月陷元汀州已亥三月友諒遣其黨趙普勝寇我寧國之太平縣總制胡惟賢命程允汪炳等擊敗之獲其糧萬餘斛普勝寇青陽石埭等縣僉院張德勝禦于柵江口破走之友諒又陷元襄陽郡八月上遣徐達率張德勝等攻安慶自無爲登陸至浮山砦擊

敗友諒部將胡總管兵追至潛山界沙河遇友諒僞
叅政郭泰領兵逆戰達等擊敗之斬郭泰大獲輜重
遂克潛山九月 上命院僉俞廷玉率兵同攻安慶
不克廷玉敗沒十月俞通海破友諒將趙普勝於安
慶十二月徐壽輝以友諒破隆興欲徙都 友諒忌
其來不利於已沮之壽輝不聽引兵發漢陽南下江
州友諒佯出迎伏兵城內候壽輝入卽閉城門伏發
盡殺其左右將士居壽輝江州友諒自稱漢王置官
屬征伐誅賞皆不稟壽輝節制庚子夏五月友諒帥
師東下聲言援安慶常遇春策其必犯池州先伏兵

九華山待之友諒果自率衆猝至伏兵大敗之俘斬二萬餘級擒二千餘人閏五月友諒率舟師寇太平圍其城守將花雲率麾下三千人迎戰三日友諒不得入乃以巨舟乘漲泊城西南隅舟尾高與城平令士卒緣之上時城中乏食士憊甚不能戰城遂陷雲與知府許瑗皆歿之友諒既陷太平忌其將趙普勝強盛誘殺之令別將守安慶友諒寇太平時挾壽輝行既得太平亟謀僭號位乃於采石舟中佯使人白事壽輝前令壯士持鐵槌從後擊之碎其首以暴疾歿令軍中遂以采石五通廟爲行殿稱皇帝國號漢

建元大義值大雨羣臣立江岸草次成禮殊無儀節以鄒魯勝爲太師張必先爲丞相餘各拜官有差乃率衆還江州友諒旣僭大號遣使約張士誠同入寇自江州引兵東下金陵大震獻計者或謀以城降或謂鍾山有王氣欲奔據之或欲決死一戰戰不勝卽走未晚 上心非諸將議劉基獨張目不言 上召基入內問計基對曰先斬主降及奔鍾山者乃可破賊 上曰先生計將安出基曰天道後舉者勝吾以逸待勞何患不克莫若傾府庫開至誠以固士心伏兵伺隙擊之取威制勝以成王業在此舉也 上意

益決或謀先復太平以牽制賊勢 上曰不可太平

吾所親築城濠塹深固賊前乘漲以舟泊乘城乃爲
所陷今往攻之猝難拔賊舟師十倍於我我頓兵堅
城之下進不能取退不及援失所據矣或又勸 上
自將禦之 上曰亦不可彼知我出以偏師綴我我
欲與戰彼不交鋒而以舟師順流下建康半日可達
吾步騎亟回百里趨戰兵法所忌皆非良策也於是
遣胡大海以兵直搗廣信制其後而召指揮康茂才
謂之曰吾有事命汝能之乎茂才曰惟所命 上曰
汝與友諒舊知今友諒入寇吾欲速其來非汝不可

汝今作書遣使給友諒僞降約爲內應招之速來給
告以虛實使分兵三道以弱其勢茂才曰諾家有老
閹舊嘗事友諒遣令賁書往必信來無疑 上以其
謀語李善長善長曰方憂寇來何爲誘致之 上曰
遲則二虜謀合爲害益大何以支今先破此虜則東
寇膽落矣善長曰善茂才遂令閹者乘小舸徑至友
諒軍友諒得書甚喜問曰康公今何在閹者曰見守
江東橋問橋何如曰木橋乃與酒食遣還謂曰歸語
康公吾至則呼老康爲驗閹者諾歸具以告 上曰
此虜入吾彀中矣乃命善長亟撤江東橋易以鐵石

比旦橋成有自友諒軍中逃歸者言友諒問新河口
路上亟命趙德勝跨新河築虎口城守之命常遇
春馮勝華高等率帳前五翼軍三萬人伏石灰山側
命徐達等陳兵南門外楊璟駐兵大勝港張德勝朱
虎率舟師出龍江關外上親總大軍于廬龍山令
偃黃幟於山之左偃赤幟於山之右令曰寇至則舉
赤幟俟舉黃幟則伏兵皆起各嚴師以待至日友諒
率舟師東下至大勝港楊璟整兵禦之港狹僅容三
舟入友諒以舟不得並進遽引退出大江徑衝江東
橋見橋皆大石非木橋乃驚疑呼老康又無應者悟

茂才使謬卽與其弟號五王者率舟師趣龍江先遣萬人登岸立柵勢甚銳時酷暑 上衣紫茸甲張蓋督兵見士卒揮汗赤日中命去蓋衆欲戰 上曰天且雨諸軍就食畢乘雨擊之衆仰視天無片雲未信忽風起西北湏臾大雨如注赤幟舉 上下令拔柵諸軍競前拔柵友諒麾其衆來爭戰方合雨止 上命發金鼓鼓大震乃令黃幟舉常遇春等伏兵起徐達兵亦至張德勝朱虎舟師並集內外合擊友諒大敗僅以身免衆潰趨舟值潮退舟膠淺殺溺死者無筭生擒七千餘人獲其將張志雄梁鉉喻國興等皆

降收得巨艦百餘艘戰舸數百友諒乘別舸脫走於
所乘舟中得茂才書上咲曰彼愚至此可唾也令
諸將追擊友諒至慈湖縱火焚其舟賊衆大潰復追
至采石大戰廖永忠率所部大呼陷陣入華雲龍躍
馬擣其中堅有王銘者獨馳入其陣賊攢槊刺之傷
額戰益力流血淋漓旋回三匝獨所殺傷過當賊大
敗張德勝戰死周顯與賊戰于觀渡橋亦敗之獲其
將士十三人諸軍乘勝追擊賊守太平者無固志遂
復太平張志雄言友諒東下併安慶兵來今俱敗安
慶無守禦者上卽命徐達將兵追之遂復安慶以

趙伯仲守之前所追胡大海擣廣信兵至靈溪亦敗其衆遂督兵攻信州賊守者不能支衆大潰克其城改信州爲廣信府以胡大海子德濟爲樞密同簽守之亡何友諒遣其將張定邊復攻陷安慶趙伯仲棄城走龍江上曰主將不能堅守城陷遠遁宜誅之常遇春等力救上不從曰軍法不嚴何以勵後遂賜弓絃令自縊而擢用其子弟辛卯三月友諒遣其將李明道寇信州據草卒鎮以遏浙東援兵德濟遣夏德潤出兵奪其墩戰歿賊又保玉山胡大海部將繆美聞之來援與賊戰于東津橋遂復玉山抵信州

絕明道歸路六月明道圖廣信急德濟遣使求援于
父大海大海率師由靈溪進李文忠亦遣兵援之德
濟聞援兵至引兵出城與大海夾擊明道大破之擒
明道及其宣慰王漢二并士卒千餘人大獲其戰馬
器械大海送明道漢二于文忠文忠令漢二招友諒
建昌守將王溥溥漢二兄弟也遂歸附乃俱送建康
上命三人仍舊官後征江州南昌用爲嚮導八月
上怒友諒悖逆決計伐之謂諸將曰友諒弑主僭
號犯我近疆殞我名將又誘殺張魯勝將士離心觀
其所爲不滅不止爾等勵士卒以從徐達曰師直爲

壯今我直彼曲何患不克 上乃親督諸將率舟師
乘風溯流而上直抵安慶命馮勝俞通海趙德勝張
志雄等擣其水寨破之攻城自旦至暮不拔劉基請
棄安慶去徑拔江州傾其巢穴 上從之遂悉師西
上長驅過小孤友諒將丁曾卽迎降師距江州五
里友諒始知之以爲神兵自天而下倉猝不能禦挈
妻子夜奔武昌友諒將傅友德亦降遂克江州乘勝
遣康茂才等進拔蘄州黃州興國黃梅廣濟等處又
遣使招諭友諒江西諸守將南昌胡美袁州歐魯祥
餘干吳宏龍泉彭時中吉安魯萬中等皆遣使納款

胡美使來請禁止數事勿散離其所部兵 上有難

色劉基從後踢 上所坐胡床 上悟許從所請賜

書慰諭之命趙德勝分兵攻下瑞州臨江諸郡鄧愈
以兵襲浮梁友諒將侯邦佐棄城遁遂取樂平等處
饒州之境悉定十月鄧愈駐兵臨川之平塘時友諒
將鄧克明據撫州佯遣使通款無降意愈知其情乘
夜往襲之旦入其城克明單騎遁初友諒走武昌徐
達追至夏陽 上命達回守江州亡何召達還建康
至中道得令還守江州友諒聞達去江州遣兵襲之
暨達還友諒兵已入江州城達擊大敗之俘斬數千